



UNIVERSITÄTS-
BIBLIOTHEK
PADERBORN

Universitätsbibliothek Paderborn

**D. Petri Chrysologi Archiepiscopi Ravennatis, viri
eruditissimi atque sanctissimi, Sermones In Evangelia De
Dominicis & festis aliquot solemnioribus totius anni,
insignes & peruetusti**

Petrus <Chrysologus>

Lvgdvni, 1623

De resurrectione Christi, sermo LXXIX.

[urn:nbn:de:hbz:466:1-50232](https://nbn-resolving.org/urn:nbn:de:hbz:466:1-50232)

De resurrectione Christi, Sermo LXXIX.

QVoniam Matthæi & Marci super dominicam resurrectionem iam cucurrimus lectionis, modò quid hinc intonuerit Lucas beatissimus, exquiramus. *Vna, inquit, sabbathi valde diluculo venerunt ad monu- mentum mulieres: portantes que parauerant aromata.* Sæpè diximus quæ circa resurrectionem Christi gesta sunt, gesta esse resurrectionis nostræ in formam, hinc est quod Euangelistæ sermone plus mystico, quàm nouo factorum Christi seriem proloquuntur, *Vna, inquit, sabbathi.* Bene vna, quia resurrectionis dies alteram nescit, lucis æternæ mater noctis tēpus ignorat, perpetuus dies perpetuo illucescit, resurgentium lux mori non potest, lux quæ noctem delet, nescit extingui. *Venerunt, inquit, ad monumentum portantes que parauerant aromata: & inuenerunt lapidem reuolutum à monumento: & intrantes non inuenerunt corpus domini Iesu.* Quid est, quòd quæ antè de monumento fugerant, nunc audaces redeunt ad sepulchrum, intrepidæ pavidum redeunt ad funus, sepulchri tristitiam confidenter inuadunt, & non inuenientes dominum, constanter quærunt, constantius immorantur: neo illud pauescunt, quòd monumento nox addita, dum tenebras generat, addit timorem? Fratres, mulier mali causa, peccati author, via mortis, sepulchri titulus, inferni ianua, lamenti necessitas tota, ob hoc nascuntur lachrymis, mancipantur mœroribus, gemitibus addicuntur, & in lamentis tantum fortes sunt, quantum viribus inueniuntur infirmæ, & quantum imparatæ sunt ad labores, tantum ad lachrymas sunt paratæ: hinc est quòd lachrymis arma vincunt, regna fletibus inclinant, lamentis totam fortitudinem virosum frangunt. Non est

ergo mirum, si ad lachrymas, ad funus, ad sepulchrū, ad obsequium dominici corporis fœminæ ardentiores Apostolis hîc videntur, vbi mulier prima currit ad lachrymas, quæ prima cucurrit ad lapsum: præcedit ad sepulchrum, quæ præcessit ad mortem; fit resurrectionis nuncia, quæ fuit mortis interpres, & quæ viro porrexerat interitus tanti nuncium, viris ipsa porrigit magnæ salutis auditum, vt compenset fidei nuncio, quod perfidiæ ademit auditu. Non est hîc præposterus ordo, sed mysticus, non postponuntur Apostoli fœminis, sed ad maiora seruantur, fœminæ obsequium Christi suscipiunt, apostoli Christi suscipiunt passiones: illæ portant aromata, isti flagella: illæ intrant sepulchrum, isti carcerem: illæ ad obsequium festinant, isti peruolant ad catenas: infundunt illæ oleum, isti sanguinem fundunt: mortem stupent illæ, suscipiunt hi mortes: & quid multa? resident illæ domi, ad acies isti tendunt, vt deuoti milites probent aduersis fidem, virtutem laboribus, iniuriis patientiam, periculis mortem, vulneribus tolerantiam, deuotionem pœnis, viscerum laceratione constantiam: mulieres ergo ferunt pro Christo lachrymas: Apostoli diabolo superato, & victis hostibus, Christo & victoriam referunt, & triumphum.

LUC. 24. Verum quodd apostoli surrexisset dominum mulieribus nunciantibus, aut non credidisse, aut deliramentum iudicasse referuntur, grauius nemo arguat, altè dubitat, qui altius credit: decipi non potest, qui non est facilis auditui, ignauus nimis est, qui post exemplum inuenitur incautus, rudis miles ad aciem concurrit, qui causam belli nescit, vim bellatoris ignorat: peritia est, non est segnities, cum sensim miles veteranus incedit. Sic Adam nouus citò cecidit, dum citò credidit, & dum facile dat aures ad mulieris au-

ris auditum, se, suosque posteros pessimo addixit inimico: at veteranus Petrus foeminam non facile audit, foeminis nunciantibus credit tarde, & vt veteranus deliberat, ne vt puer incurrat: denique vbi duo ex discipulis, qui post resurrectionem Christum meruerunt itineris habere collegam, reuersi, nunciabant dominum se vidisse. Apostoli quod audiunt non delirum iudicant, sed virile, dant aures, ora figunt, aperiunt oculos, corda pandunt, & quæ dicuntur sic commendant sensibus, vt post cunctationis æstus sitienter bibant auditum fidei de flumine, quod collegarum lingua fundebat. Sicut ardorem sitis frigida pocula restinguunt & refrigerant, ita mentis auditus latior fit post mœrorem. Fratres, quis causas capere dominicæ natiuitatis potest? Dominicæ resurrectionis negocium existimare quis meretur? Ista cogitare, capere, existimare, nisi qui ab ipso Deo acceperit, non valebit: quod creator rerum foemineo creatur partu, quod mundi Dominus in seruitute videtur humana, quod pastor omnium pastu indiget, reis quod addicitur, qui absoluit vniuersos, quod punitur vita sæculi, quod mortuorum moritur suscitator, quod claudens omnia sepulchro clauditur, quod supernorum dominus apud inferos inuenitur; qui ergo ista capere potest, apostolorum cunctationes, trepidationes, timores, fugas, latebras profunde iudicans, non miratur. Ergo fratres quod apostoli dubitant, quod ista tam tarde tanta credulitate suscipiunt, non miremur nos qui hucusque non credimus, sed oremus, vt de his tantum sentire mereamur, quantum dederit ille, qui diuina hominem sentire largitur. Quod remansit de serie lectionis, Deo iuuante, proximo sermone perscrutabimur.